


傷寒證治述要

鄂城陳宜生編纂

蘇鍾貞題





民國二十一年八月初版



(版 權 所 有)

(翻 印 必 究)

傷寒證治述要

全 一 册

(每本定價大洋叁角)

編纂者 鄂城陳邦鎖宜生

印刷處

武昌候補街
永盛印書館
電話一四六

寄售處 各大書局

傷寒證治述要序

陰陽二氣之周流於天地間暢其神化之用以乘日月往來之陳迹寒暑遞代之經由而後綑縲之以成萬物此固乃千歲可承衍之者然其中晦明或有所舛錯冷熱或有所悖逆以及夫水旱風雨日月薄蝕山崩地震一切妖孽之爲異庸遽在二氣之自失其宰乎母亦謂常變相爲倚伏非能知消息自然之序而隨爲之準酌有莫之補偏救弊者故聖人之贊育立極易且有窮則變變則通之說也已世之爲醫功亦彰夫補救陰陽二氣之偏弊而萬物之最靈貴者曰人咸賴之以利生耳舉凡芸芸滋衆惟飲食男女爲一生涸精戕性之原而又鮮垣方視見者爲之先幾致戒迨既真元內燬邪襲環乘五藏六府之微芒靡可扞四時五行之乖厲浸焉而疾在腠理浸焉而疾在血脈浸焉而疾在腸胃浸焉而疾在骨髓雖俞跗亦末如之何已卽或營衛自慎診視方殷而懸壺之庸陋者多更每墟

拘墨守奮一隅之藥遂暴蹶不興噫悲矣哉蓋偏弊之氣所以感之爲病者初不越乎中風傷寒溼溫熱病溫病著之於難經析之於仲聖而統謂之傷寒其投劑之途亦不越乎發解和攻救五者如古今號爲醫家王肯堂徐靈胎黃元御曾香田輩皆兢兢分條探源必知患之所自理明而法宜觸手以起洵莫勝書若昧於天時水土氣候之參差暨其人之性質趨向則僅恃診脈以立方悍然罔問端委挾傷寒淺註幾且妄用辛味激發顛狂使後之人反歸獄於仲聖并謬言桂枝芍藥爲大補陰陽之秘品卽王叔和桂枝下咽陽盛則斃之語亦未曾聞夫豈得曰補救之兩窮歟不善於通而已矣然則陰陽二氣之周流於天地間者適有待於醫之助其神化而有以轉變爲常乃醫也滯泥來臨撥應因輸務偏其所偏弊其所弊而不已之又奚符彼天地生人之心歟世之無年及中壽也何惑之有况症象變更且夕迥殊時而發時而解時而和時而攻時而救弗能忽也

傷寒與傷風相似中熱與中暑相似顧曰治病定症主乎診脈而扁鵲之特以診脈爲名究未可不信癥結之明亟先望聞與問也唯厥弗急俶免迂塞彼草菅人命者邦有恒刑誰無父母誰無妻子是而可忍孰不忍乎同學鄂城陳君宜生爲醫服膺仲聖之遺言間復博綜諸家之心得慨然撰傷寒證治述要一書知夫陰陽二氣周流於天地間常變相爲倚伏將補救其偏弊必待參消息以求通感之於人之與時調節一一審證期期於服湯復故能生死人語不云乎不得爲相起爲良醫陳君其有領悟夫易說乎乃亦贊育立極之初步陳君學道日篤世猶引重恐有待暢天地間神化之用者在其勉茲小試也歟哉讀竟敢書所見聞以歸之歲在玄默涖灘孟夏之月漢陽黃嗣艾

傷寒證治述要弁言

傷寒之書浩如煙海傷寒之證頭緒紛繁內經備言傷寒砭刺之法難經謂傷寒有五卽傷寒熱病中風濕溫病是也蓋不必春夏秋冬不熱熱因寒而病凡感於六淫之氣而身熱脈滑者皆謂之傷寒仲景爲醫中之聖成傷寒之書猶六經也其一百一十三方三百九十一法方至精法至備矣特是傷寒之變態不測又有順傳過傳隔傳之分故陶節庵曰得其綱領易如拾芥求之多歧則支離破碎如涉海問津矣是貴探其要察其脈審其證凡表裏陰陽虛實寒熱諸證審之旣確然後施治乃易處方亦無不當差之毫釐謬以千里可不慎歟六經傳變雖有定日而日數旣不可拘汗下尤宜分明黃帝云未滿三日可汗滿三日可泄然人有虛實邪有遲速日雖多尙有表證而脈浮數猶當發汗日數雖少已有裏證而脈沈細卽當下且四時發汗輕重不同地氣所關處方亦異倫夏至前後青

荆分野混同施治貽害匪輕又如傷寒與傷風相似熱病與中暑相似而脈象之緊浮洪細有汗無汗均各不同是知證別陰陽治分寒熱倘陽證用惑熱藥陰證用涼藥乃仲景所謂桂枝下咽陽盛則斃承氣入胃盛則亡一藥之誤噉臍何及故隋唐以後諸大家之於傷寒備載時氣病證如解陰論明理論方論審證表舌鑑心鏡直指等著述反覆研究不厭精詳蓋誠見夫傷寒傳變無定審證不易非得要領診治綦難也某賦性疎拙多病健忘竊思仲聖之書雖論傷寒其方法之精備神而明之可推行而治雜症觀張子河劉河間李東垣朱丹溪諸公師其意而各有所主皆能利濟當時有功後世爰本仲聖心法謹效許知可傷寒九十論王肯堂證治準繩徐靈胎傷寒論方葉天士傷寒諸證論之體式以及瀏覽諸大家傷寒書之所得分證纂述彙爲若干條名曰傷寒證治述要不過自備翻閱以代記珠疎漏之處尙希明達有以匡正之鄂城陳宜生謹識

傷寒證治述要目錄

傷寒自解證治

遺尿證治 亦屬三陽合病

陰病陽脈證治

傷寒協熱利證治

太陽桂枝證治

陰中伏陽證治

傷寒耳聾證治

太陽瘀血證治

太陰證治

傷寒脅痛證治

陽明可下證治

少陰證治

傷寒溫瘧證治

陽明蜜兌證治

少陰脈緊證治

傷寒下利證治

陽明急下證治

厥陰證治

傷寒閉目證治

陽明當下證治

小便出血證治

傷寒表實證治

刺陽明證治

臍中出血證治

寒熱類傷寒證治

太陽陽明合病證治

熱入血室證治

妊娠傷寒脚腫證治

少陽證治

下膿血證治

三陽合病證治

格陽關陰證治

衄血證治

失汗衄血證治

剛瘧證治

青筋牽引證治

血結胸證治

漏風證治

霍亂轉筋證治

結胸可下證治

風溫證治

叉手冒心證治

結胸可灸證治

溼溫證治

揚手擲足證治

汗後呃逆證治

溼家發黃證治

兩手撮空證治

汗後勞復證治

發黃證治

舌上滑胎證治

汗後瘡瘍證治

黃人清道證治

陰陽易證治

先汗後下證治

脾約證治

狐惑證治

兩脛逆冷證治

胃熱嘔吐證治

懊懣怫鬱證治

手足逆冷證治

陽結證治

夜間不眠證治

發熱惡寒證治

發斑證治

下利服承氣湯證治

面垢惡寒證治

筋惕肉瞤證治

傷寒證治述要

鄂城陳邦鎮宜生纂述

傷寒自解證治

傷寒口中氣熱唇乾屈體臥足冷舌上有苔尺寸俱緊是寒邪勝也宜服溫劑

按仲景云陰陽俱緊口中氣熱唇乾舌燥蹇臥足冷鼻中涕出舌上苔滑勿妄治也到七日以來其人發熱手足溫者此爲欲解蓋以上證候皆是陰盛陽弱故予以抑陰助陽之溫劑則緊脈漸退四體漸和不汗而自解矣

傷寒協熱利證治

傷寒頭痛身熱下利不止脈遲而沉臍下熱則是協熱利投三黃熟艾湯三服而利止渴除漸投以解飢汗藥而得汗瘥

按協熱者卽表邪傳裏裏虛協熱而自下利也又有不應下而誤攻之內虛協熱而下利者協熱利其臍下必熱渴欲飲水泄下黃赤發熱後重蓋三陽下利則身熱太陰下利則手足溫少陰厥陰下利則身涼無熱此確論也下利挾太陽脈證便不得用溫藥至若下利而有頭痛腰疼肌熱目疼鼻乾脈長者此太陽陽明合病葛根湯主之若下利而有頭痛胸滿口苦咽乾或往來寒熱脈弦而嘔者此太陽少陽合病柴苓湯主之若下利而有身熱脇痛往來寒熱或乾嘔脈弦而長者此陽明少陽合病承氣湯主之

傷寒耳聾證治

傷寒八九日耳聾無聞脈弱無力並無渴飲心煩昏寐咽痛諸症但多汗驚悸必汗過多所致也投以真武湯白朮附子湯等數日耳有聞而愈

按耳聾者邪傳少陽之經也若未曾經汗宜和解曾重發汗宜補

傷寒脅痛證治

傷寒數日兩脅挾臍痛不可忍蓋少陽膽經循脅入臍邪在此經故心煩嘔渴往來寒熱默不能食胸脅滿悶少陽證也始太陽傳入此經故有是證

按仲景云太陽病不解傳入少陽脅下滿乾嘔者小柴胡湯主之三投而痛止續得汗解

傷寒溫瘧證治

傷寒身大熱頭痛自汗惡熱陽明證也如裏病未除當風取涼越半月必寒熱交作則爲壞病溫瘧矣

按仲景云若十三日以上更感異氣變爲他病者當依舊壞病證而治之若脈陰陽俱盛重感於寒變成溫瘧脈之變證方治如法乃小柴胡湯之類加桂治之愈

又按瘧證最有暑瘧食瘧脾寒瘧手足三陰三陽皆有瘧脾肺腎心胃亦有瘧各各不同素問曰夏傷於暑秋爲痎瘧又曰夏暑汗不出者秋成風瘧始因伏暑得秋氣乃發故先熱後寒或熱多寒少頭目昏痛虛則發戰汗出一時而止蓋心惡暑氣心爲君心不受邪而心包絡痰涎所聚暑伏於涎中豈比脾寒而厚朴草果所能驅溫瘧而柴胡黃芩所能止也非砒硃腦麝之屬不能入故暑瘧而妄投以寒藥真氣先受病所以連綿不已也瘧證一病要在別其證類然後行藥素問瘧論甚詳當細玩之

傷寒下利證治

傷寒自利腹滿不煩不渴嘔吐頭痛趺陽脉大而緊者太陰證也仲景云自利不渴屬太陰調治數日愈

按仲景謂趺陽脉大而緊者當卽下利脉經云下利脉大爲未止脉微

細者今日愈又論跌陽脉九十一處皆因脾胃而設也且如稱跌陽脉滑而緊則曰滑乃胃實緊乃脾弱跌陽脉浮而濇則曰浮爲吐逆水穀不化濇則食不得入跌陽脉緊而浮浮則腹滿緊則絞痛跌陽脈不出則曰脾虛上下身冷膚硬則皆脾胃之設可知矣大抵外證腹滿自利嘔惡吐逆之類審是病在脾胃而又參以跌陽之脉則無失矣其脉見於足趺之陽故曰跌陽仲景譏世人握手而不及足

傷寒閉目證治

傷寒惡寒發熱口中氣熱如火不絕七八日矣而目閉不欲開其脉陰陽俱緊是必汗之而復下之之故此壞證也投以小柴胡湯五啜可愈

按仲景稱傷寒發熱口中氣勃勃然頭痛目黃若下之則目閉又云傷寒脈陰陽俱緊惡寒發熱目赤醫復汗之咽中傷若復下兩目閉此壞證須小柴胡湯調之愈

傷寒表實證治

傷寒身熱頭痛邪在表此表實證也當汗之以麻黃輩數日愈

按傷寒因虛故邪得以入今邪在表何以爲表實也蓋邪之人也始因虛及邪居中反爲實矣大抵調治傷寒先要明表裏虛實能明此四字則仲景三百九十七法可坐而定也何以明之有表實有表虛有裏實有裏虛有表裏俱實表裏俱虛

表裏虛實百證歌中論之甚詳

仲景麻黃湯類爲表實

而設也桂枝湯類爲表虛而設也裏實承氣之類裏虛四逆理中之類表裏俱實所謂陽盛陰虛下之則愈也表裏俱虛所謂陰盛陽虛汗之則愈也

寒熱類傷寒證治

一尼病惡風體倦乍寒乍熱面赤心煩時或有汗診之兩手不受邪厥陰脈弦長而上魚際此非傷寒乃陰動不得陽也投以抑陰等葯數日即愈

按褚澄云治師尼寡婦別製方蓋有爲也其獨居怨曠孤陰無陽欲心屢萌而莫能遂是以陰陽交爭乍寒乍熱虛汗倦怠全類溫瘧久久成勞瘵矣史記倉公傳載濟北王侍者繡女病腰背寒熱衆醫皆爲寒熱也倉公曰病得之欲男子而不可得也何以知之診其脈肝部弦出寸口是以知也男子以精爲主女子以血爲主男子精溢則思室女子血盛則懷胎肝攝血者也今肝脈弦上寸口及魚際則血盛欲男子之候也然則治師尼寡婦不可與尋常婦人一概論矣

妊娠傷寒脚腫證治

婦人妊娠得傷寒自腰以下腫滿病名曰心實當利小便

按仲景玉函經曰婦人傷寒妊娠及七月腹滿腰以下如水溢之狀此心實當刺勞宮及關元以利小便則愈

三陽合病證治

腹痛體重不能轉側小便遺失此三陽合病證也仲景陽明篇云三陽合病腹腹滿身重難以轉側口不仁而面垢譫語遺尿不可汗汗則譫語下則額上生汗手足逆冷若自汗出者白虎湯主之

按譫語有因風致燥而譫語者有汗多亡液而譫語者有三陽合病而譫語者腹滿陽明經熱合於前也身重太陽經熱合於後也難以轉側少陽經熱合於側也三證見而一身之前後左右俱熱氣瀰漫矣口不仁而面垢熱合少陽之府也譫語熱合陽明之府也遺尿熱合太陽之府也大抵三陽主外三陰主內陽實於外陰虛於內故不可發汗以耗欲竭之陰陽浮於中陰孤於內故不可下以傷其欲脫之微陽經云自汗出一證者白虎湯主之苟非自汗出恐表邪抑塞亦不敢鹵莽輕用此言三陽合病之譫語也

遺尿證治 亦屬三陽合病

腹滿身重遺尿言語失常其脈浮大而長或謂不可治也腎絕矣仲景不云乎洩便遺失狂言反目直視此謂腎絕不知其脈浮大而長乃三陽合病也非腎絕今病人譫語者以不當汗而汗之非狂言反目直視須是腎絕脈方可言此證投以白虎加人參湯數服而病除

按葉天士曰若陽邪譫妄神昏而遺尿者當清心解熱若陰邪厥逆脈微寒極而遺尿者當溫腎散寒設或狂言直視而遺尿又爲腎絕而不可治也

太陽桂枝證治

傷寒身熱自汗惡流風鼻出涕關以上浮關以下弱此桂枝證也仲景法中第一方面而世人不究耳一服而微汗解翌日諸苦頓除

按仲景論表證一則桂枝二則麻黃三則青龍桂枝則治中風麻黃治傷寒青龍治中風見寒脈傷寒見風脈此三者人皆能言而不知用藥

對證之妙處且脈浮而緩中風也故齋齋惡寒淅淅惡風翁翁發熱仲景以桂枝對之脈浮緊而澀傷寒也故頭痛發熱身痛腰痛骨節皆痛惡風無汗而喘仲景以麻黃對之至於中風脈緊傷寒脈浮緩仲景皆以青龍對之何也風傷衛衛氣也寒傷營營血也營行脈中衛行脈外風傷衛則風邪中於陽氣陽氣不固發越而爲汗是以汗出而表虛故仲景用桂枝以發汗芍藥以利其血蓋中風病在脈之外其病稍輕雖同曰發汗特解肌之藥耳故桂枝證云令遍身漉漉微似有汗者益佳不可如水淋漓病必不除是知中風不可大發其汗發其汗反動營血邪乘虛而居故病不除也寒傷營則寒邪干於陰血而營行脈中者寒邪客於脈中非特營受病也邪自作併於衛氣犯之久則浸淫及骨是以汗不出而熱煩仲景以麻黃大發其汗又以桂枝辛甘助其發散欲捐其內外之邪營衛之病耳大抵二藥皆發汗而桂枝則發衛之邪麻

黃芩衛與營而治之仲景桂枝第十九證云病常自汗出者此爲營氣和營氣和者外不諧以衛氣不共營氣和諧故耳營行脈中衛行脈外復發其汗營衛和則愈宜桂枝湯又第四十七證云發熱汗出者此謂營弱衛強故其汗出欲救風邪宜桂枝湯是知中風汗出者營和而衛不和也又第一卷云寸口脈浮而緊浮則爲風緊則爲寒風則傷衛寒則傷營營衛俱病也麻黃湯中併桂枝而用此仲景之意歟至於青龍雖治傷寒見風脈傷風見寒脈然仲景云汗出惡風不可服之服之則厥逆筋惕肉瞤故青龍一證尤難用須是形證的當然後可行王寔大夫證治止用桂枝麻黃各半湯

即桂枝麻黃合併

代之蓋慎之也夫

太陽中暍證治

得病身疼痛發熱體重其脈虛弱已數日矣此中暍病也宜瓜蒂散

按中景論暍有三證一則汗出惡寒身熱而渴一則發熱惡寒身疼痛

其脈弦細芤遲一則夏月傷冷水水行皮中身熱疼痛體重而脈微弱不可下不可行溫鍼此太陽經中暍也上二證宜用百虎加人參湯後一證宜用瓜蒂散方治不見於本論而見於金匱要略其脈證云治太陽中暍身熱疼痛而微弱者夏月傷冷水水行皮中所致宜瓜蒂散蓋謂此也

太陽瘀血證治

病傷寒七八日脈微而沉身黃發狂小腹脹滿臍下如冰小便反利此瘀血證也宜抵當湯

按仲景云太陽病身黃脈沉結小腹硬小便不利爲無血小便自利其人如狂者血證也可用抵當湯再投而下血幾數升狂止得汗而解經云血在下則狂在上則忘太陽膀胱經也隨經而蓄於膀胱故臍下自關門會滲入大腸若大便黑者此其驗也

陽明可下證治

有武弁年踰七十傷寒五六日脈洪大而長大便不通身熱無汗此陽明證也蓋熱邪毒氣並蓄於陽明況陽明經絡多血少氣不問老壯當下投以大承氣湯先下燥糞十數枚次溏洩一行穢不可近汗濺然周身一時頃汗止身涼諸苦遂除

按此證下後既解並不宜續服補劑補則熱仍復自此但食粥可也夫老壯者形氣也寒熱者病邪也臟有熱毒雖衰年亦可下臟有寒邪雖壯年亦可溫要之與病相當耳

陽明蜜兌證治

傷寒近旬日熱而自汗大便不通小便如常神昏多睡診其脈長大而虛此亦陽明證也雖爲陽明此證不可下仲景云陽明自汗小便利者爲津液內竭雖堅不可攻宜蜜兌導作三劑三易之先下燥糞次溏洩已而汗

解

按二陽明證雖相似然自汗小便利者不可蕩滌五臟爲無津液也然則傷寒大證相似脈與證稍異通變爲要

陽明急下證治

傷寒身熱目痛鼻乾不眠大便不通尺寸俱大已數日矣忽而汗大出宜速以大柴胡湯下之

按仲景論陽明病多汗者急下之其所稱急下之者纔覺汗出二便均不利未至津液乾燥速下之則爲徑捷免致用蜜兌也蓋用蜜兌已是失下出於不得已耳或曰陽明自汗津液已竭當用蜜兌何故用大柴胡湯殆不知此乃仲景不傳妙處

陽明當下證治

傷寒身熱大便不通煩渴鬱冒一醫以巴豆下之雖得溏利而病如舊不

知陽明熱結在裏非大柴胡承氣不可亟進大柴胡三服溏利汗解而愈
按巴豆止去寒積豈能蕩滌邪熱溫毒耶且巴豆性熱大毒而病熱人
服之非徒無益而爲害不小矣

刺陽明證治

傷寒身熱頭痛無汗渾身疼痛脈浮大而緊刺陽明少間汗出遍身踰數
時身涼病退

按刺熱論云熱病先手臂刺陽明而汗出又云刺陽明出血大如豆病
已蓋謂刺也陽明血在手大指內側去爪甲角手陽明脈之所出也刺
可入同身寸之一分留一呼大凡傷寒熱病有難取汗者莫如鍼之爲
妙仲景云凡治溫病可刺五十九穴素問云病甚者爲五十九刺

詳註
中

太陽陽明合病證治

傷寒脈浮而長喘而胸滿身熱頭痛腰脊強鼻乾不得眠此太陽陽明合

病證也仲景法中有三證下利者葛根湯不利嘔逆者加半夏喘而胃滿者麻黃湯也治以麻黃湯得汗而解

按傳入之次第自太陽陽明少陽太陰少陰厥陰蓋以六氣在天而考之則厥陰爲初之氣少陰爲二之氣太陰爲三之氣少陽爲四之氣陽明爲五之氣太陽爲六之氣此順也逆而言之則太陽而後陽明陽明而後少陽少陽而後太陰太陰而後少陰少陰而後厥陰傷寒爲病在氣則逆而非順故自太陽而終厥陰也

少陽證治

頭痛發熱耳聾目赤胸中滿悶或見其外證胸滿遂吐之既吐病仍在又見其目赤發熱復利之病不除惴惴然恟慄不知此少陽證也恟慄者誤吐下之過仲景云少陽中風兩耳無聞目赤胸滿而煩者不可吐下吐下則驚悸此當用小柴胡湯今誤吐下則成壞證矣以牡蠣四逆湯調於前

繼之以桂枝柴胡各半湯旬日瘥

按仲景雖云三陽受病未入於臟者可汗然少陽脈弦細則不可汗將入少陰也若誤吐下之是逆之當以救逆爲先待驚悸定後治餘證

格陽關陰證治

傷寒八九日以上吐逆食不得入小便癃悶不通其脈寸上二溢而尺覆關中伏而不見此格陽關陰證也陽溢於上不得下行陰覆於下不得上達中有關格之病是以屢汗而不得汗也投以透膈散三啜吐止小便利而解

按素問曰人迎四盛以上爲格陽寸口四盛以上爲關陰人迎與寸口俱盛四倍以上爲關格仲景云在尺爲關在寸爲格關則小便不利格則吐逆又跌陽脈伏而澀伏則吐逆水穀不化澀則食不得入名曰關格李士材曰關者陰盛之極故關閉而洩不得通格者陽盛之極故格

拒而食不得入也然關脈沈伏而澀尺寸有覆溢者關格病也今陽不降上魚際爲溢故其病吐逆名爲外格陰不得上浮入尺爲覆故其病小便不通爲內關此則關格之異也

陰病陽脈證治

初得病四肢逆冷臍中築痛身疼如被杖其脈沈而滑蓋沈者陰證也滑者陽脈也病雖陰而是陽脈仲景所謂陰證見陽脈生也灸臍下丹田百壯手足溫陽回體熱而汗解

按仲景云翁奄沈名曰滑古人論滑脈雖云往來前却流利展轉替然與數相似曾未若仲景三語而足也翁合也言張而復合也故云翁爲正陽沈言脈降而下也故曰沈爲純陰方翁而合俄降而下奄謂奄忽之間復降也仲景論方爲諦當

陰中伏陽證治

得病六脈俱沈不見深按至骨則弦細有力頭昏身溫煩燥手指末皆冷中滿惡心此陰中伏陽也宜用破陰丹以行氣導水自愈

按陰中伏陽仲景方無此證而世人患者多若用熱藥助之則陰邪隔絕不能引導其陽反生客熱用寒藥則所伏真火愈見銷鑠須是用破陰丹行氣導水之藥火升水降然後得汗而解以冷鹽湯下破陰丹三十丸作一服不半時應煩燥狂熱手足漸溫譫語躁擾蓋汗證也須臾稍寧略睡灑然汗出自昏達旦方止身涼而病除

破陰丹方 硫黃水 銀各一兩結沙青

皮半兩爲末麵糊和丸桐子大每服三十丸冷鹽湯送下出中藏經方脈舉要

太陰證治

傷寒六七日腹滿而吐食不下身溫手足熱自利腹中痛嘔惡心其脈細而沈此太陰證也太陰之爲病腹滿而吐食不下自利益甚時腹自痛始止以理中丸如雞子黃大晝夜投五六枚繼以五積散數日愈

按仲景雖有三陰三陽然就一證中又有偏勝多寡須是分明辨質在何經絡方與證候相應用藥有準且如太陰少陰就陰證中自有補瀉豈可止謂之陰證哉

少陰證治

傷寒數日自汗咽喉腫痛上吐下利其脈三部俱緊或作伏氣診者非是乃少陰證也先以吳茱萸湯救之次調之以諸藥而愈

按仲景論伏氣之病云其脈微弱喉中痛似傷寒非喉痺也實咽中痛復下利仲景少陰云病人手足俱緊反汗出者亡陽也此屬少陰證當咽痛而復吐利今三部脈俱緊而又自汗咽痛吐利與伏氣異蓋伏氣脈必浮弱謂非時寒冷着人肌膚咽喉先痛次下利者是也

少陰脈緊證治

傷寒六七日煩昏睡多吐嘔小便白色自汗出其脈寸口尺中俱緊此寒

中少陰經中是以脈緊當作少陰治也仲景云病人脈緊反汗出者亡陽也屬少陰證當咽痛而復吐利蓋謂此也

按亡汗若吐以肺裏寒故今脈緊又寸口脈微尺中緊其人虛損多汗蓋寒邪入經絡所致皆虛寒之脈也其在陽經則浮而緊在陰經則沈而緊故仲景云浮而緊者名爲傷寒又云陽明脈浮而緊者必爲潮溼此在陽則浮而緊者仲景又云病人脈陰陽俱緊者屬少陰又云寸口脈微尺脈緊其人虛損多汗則陰常在絕不見陽又云少陰脈緊至七八日自下利脈暴微手足反溫脈緊反去者此欲解也此在陰沈而緊也仲景又云浮爲在表沈爲在裏數爲在腑遲爲在臟欲知表裏臟腑先以浮沈遲數爲定然後兼餘脈而定陽陰也

厥陰證治

病渴甚飲水不止胸中熱痛氣衝心下吐蟲八九日矣其脈沈而緩遲此

厥陰證也仲景云厥陰爲病消渴氣上撞心飢不欲食食則吐衄又曰厥陰病渴欲飲水者少少與之愈今病人飲水過多以茯苓甘草白朮桂枝湯治之得止後投以烏梅丸數日愈

按病至厥陰若太陽傳者三陰三陽皆已遍惟恐脉強則肝邪盛脾土受尅故舌卷囊縮而死若脉來遲緩而沈則土脉得氣脾不受尅故有可喜之道仲景云衛氣和名曰緩營氣和名曰遲遲緩相搏名曰沈又曰寸口脈緩而遲緩則陽氣長其色鮮其顏光其聲商遲則陰氣盛骨髓滿精血生肌肉緊營衛俱行剛柔相濟豈非安脈耶

小便出血證治

某病中脘吐心下煩悶多昏睡倦臥手足冷此少陰證也十餘日不瘥忽爾通身大熱小便出血蓋陰虛者陽必湊之且脈細弱而臍下不痛未可下桃仁承氣佐以芍藥地黃三投而愈

按傅青主曰便血出於後陰尿血出於前陰最難調治然總之皆出血於下也方用生地一兩地榆三錢二證俱愈蓋大小便各有經絡而其證皆因膀胱之熱生地地榆俱能清膀胱之熱一方兩用分中有合又陳遠公辨證奇聞曰小腸無血出血則心傷人立死尿血者因不慎酒色精欲泄因驚縮入精已離位不能仍返腎宮小腸因驚不能直泄其水則水積火生熱極煎熬所留之精化血而出實本腎精非小便血法宜利水以解小腸之火用水火兩通湯車前子梔子各三錢茯苓當歸各五錢木通黃柏扁蓄各一錢白芍生地各一兩二劑痛定血止三劑全愈此二說均各有見地並記以供研究

臍中出血證治

有婦人得傷寒數日咽乾煩渴脉弦細某醫汗之其始衄血繼而臍中出血某醫驚駭而遁此少陰證強汗之所致也投以薑附湯數服血止後得

微汗愈

按少陰證不當發汗仲景云少陰證強發汗必動其血未知從何道而出或從口鼻或從耳目是爲下厥上竭此爲難治仲景又云無治法無藥方蓋其本少陰證而誤汗之故血妄行自臍中出若服止血藥可見其標而不見其本治少陰之本而用薑附故血止而病除

熱入血室證治

某女子病傷寒七八日昏寒喉中涎響如鋸目瞑不知人病勢極矣詢其未昏寒以前證其母曰初病四五日夜間譫語如見鬼狀得病值經水方來因身熱病作而止此蓋熱入血室也宜先化其涎後除其熱

按仲景云婦人中風發熱經水適來晝間明了夜則譫語發作有時此爲熱入血室醫者不曉例以熱葯補之遂致胸膈不利三焦不通涎潮上皖喘急息高此證當先化其涎投以一呷散約兩時間必涎定得睡

漸省人事再投以小柴胡湯加生地黃以除其熱自無汗而解

下膿血證治

某患傷寒醫誤以陰證治之硫黃附子相繼而進旬日大脹下膿血或如赤豆汁蓋表裏虛熱氣乘虛入腸胃而又投以燥藥是以下膿血也投以梅煎散數劑愈

按葉天士論腸澀下血曰藏毒乃風暑熱蘊毒臟腑而下瘀血腸風乃風邪入臟而下清血糞前爲近血糞後爲遠血宜升補陽明不可純用寒涼須知寒因熱用之法酒浸炒苧連槐花升麻秦艽白朮四物歸脾之類果是風加荆芥防風邪減收濟用烏梅地榆溫散加炒乾薑又陳遠公曰人謂大便下血糞前屬小腸糞後屬大腸蓋小腸無血大便下血統小便以辨證則可以糞前屬小腸則不可宜單治大腸然腎主二便腎水無濟故火旺而致下血宜用三地湯生地熟地當歸各一兩地

榆三錢木耳末五錢一二劑全愈此精血雙補腸潤不燥血自止矣

衄血證治

傷寒七八日口燥飲水而不嚥入俄而衄血脈浮緊身熱或謂傷寒脈浮緊不發汗因致衄血者屬麻黃湯不知古人雖云當汗不汗熱化爲血然此證亦有不可汗者

按仲景云陽明病口燥但欲飲水而不嚥者必發衄衄家不可發汗發汗則額上陷不得眠不能胸目動也與瞬同此只可用犀角地黄湯

失汗衄血證治

某得傷寒發熱身疼骨節痛惡風無汗或勸其不須服藥待其自安如是半月而病不除不得已召醫治之其先醫至問日數又不審其脈與外證但云已過期矣不可汗下且與調氣葯以扶正氣豈知診其脈浮濇而緊大此麻黃證無疑者恐當汗不汗將化爲衄血已而果衄血作急以麻黃

湯與之繼之以犀角地黄湯血止汗解愈

按仲景云凡作湯藥不可避晨夜覺病須臾卽宜便治不等早晚則易愈或稍遲病卽傳變雖欲除必難爲力今醫不究根源執以死法必汗之於四日之前下之於四日之後殊不知此惑也又有所謂病不服藥猶得中醫此爲無醫而設也若大小便不通必待其自瘥乎蓋前後不得洩必下部腹脹數日死矣又况結胸蓄血發狂發斑之類未有勿藥而愈者知者知變愚者執迷以取禍也須是隨病淺深在表在裏或陰或陽早爲治療如救火及溺然庶易瘥素問云邪風之至疾如風雨故善治者治皮毛其次治肌膚其次治筋脉其次治六腑其次治五臟治五臟者半死半生也扁鵲望齊侯而逃其斯之謂歟

血結胸證治

一婦患傷寒寒熱夜則譫語目中見鬼狂躁不甯越數日已作結胸之狀

初病經水適來忽斷亦是熱入血室證若急行小柴胡湯必愈然前醫不識涵養至此遂成結胸證藥不可及也無已則有一法刺期門穴或庶幾愈如法而痊

按熱入血室而成結胸者因邪入經絡與正氣相搏上下流行或遇經水適來適斷邪氣乘虛而入血室血與邪迫上入肝經肝既受邪則譫語如見鬼肝病則見鬼目昏則見鬼復入膈中則血結於胸也何則蓋婦人平居經水常養於目血常養肝也方未孕則下之以爲月水既妊娠中蓄之以養胎及已產則上壅得金化之以爲乳今邪逐之併歸肝經聚於膈中壅於乳下非刺期門以瀉之不可也期門者肝之膜原使其未聚於乳則小柴胡尙可行之既聚於乳小柴胡不可用也惟有刺期門穴之一法

結胸可下證治

頭痛發熱惡風醫者下之忽爾心下堅硬項強短氣宛然結胸證也幸脉不浮心不煩躁非陷胸湯不可投之一宿乃下

按仲景云病發於陽而反下之熱入於胸因作結胸者以下之太早故也蓋惡寒尙有表證未罷而下之故陽氣內陷腹內拒痛脉浮者不可下之下之則死結胸煩躁者必死此是惡證宜細辨

結胸可灸證治

傷寒結胸狀如瘕自心至臍手不可近短氣心煩真結胸也醫者便欲下之然其脉自關以上浮大浮證未罷不可下也急以黃連餅子灸臍中數十壯得氣下心腹漸軟繼以和氣解肌藥數日瘥當時若下定是醫煞

汗後呃逆證治

得汗後呃逆或者以胃虛則噦故呃逆也投以乾薑橘皮等湯不下不知此證不可全作胃虛治六脈尙燥是餘毒未解耳投以小柴胡湯兩啜而

愈

按葉天士曰呃逆之病或胃中實熱失下而作或服寒涼太過胃中虛冷而作或胃中痰火衝逆而作或水氣停蓄而作或食積壅塞而作寒者溫中以散寒熱者涼膈以逐熱水停者分利之食積者消導之痰逆者開豁之俱用引而伸之達而降之推而逐之由而順之無不愈也

汗後勞復證治

有人傷寒得汗數日忽身熱自汗脈弦數宛然復作此勞心所致也神之所舍未復其初而又勞傷其神營衛失度當補其子益其脾解其勞庶幾便愈

按難經曰虛則補其母實則瀉其子此虛則當補其母也千金方心勞甚者補脾氣以益其心脾旺則感於心矣此勞則補其子也蓋母生我者也子繼我助我者也方治其虛則補其生我者與錦囊所謂本骸得

氣遺體受蔭同義方治其勞則補其助我者與荀子未有子富而父貧同義故二者補法各自有理

汗後瘡瘍證治

傷寒發熱面目俱赤氣上衝腹滿大小便閉無汗脉緊而長應服大承氣湯然他醫以小柴胡湯與之不驗又以大柴胡湯與之亦不效又增大柴胡湯大劑大便通下燥屎得愈乃誇曰果不須大承氣湯不知苟圖目前而貽禍於後病雖瘥必作瘡瘍之證後半月忽體生赤瘡次日背發腫如盤堅如石痛不可忍渠以爲背疽是瘡瘍之證也若當日服大承氣無此患矣如法治數日瘥

按仲景云跌陽脉滑而緊者胃氣實脾氣強持實擊強痛還自傷以手把刀坐作瘍蓋病勢有淺深藥力有輕重治者必須察病者如何疾勢深則以重劑與之疾勢淺則以輕劑與之正如持衡錙銖不偏也不然

焉用七方十劑病人毒邪既深須藉朴硝大黃蕩滌臟腑經絡毒氣利三兩行則邪毒皆去醫但小心謹慎又不能了見根源而以大柴胡得屎因謂大便通行便得安全不知遺禍於後必發瘡瘍

先汗後下證治

夏病傷寒甚熱頭痛無汗大便不通已五日矣某醫將以大黃芒硝下之然診其脉緩而浮臥密室自稱惡風表證如此雖大便閉腹且不滿別無所苦何遽便下於仲景法須表證罷方可下不爾邪毒乘虛而入內不爲結胸必爲協熱利也始投桂枝麻黃各半湯繼以小柴胡湯藜藜然汗出大便通數日愈

按仲景云傷寒多從風寒得之如表中風寒入裏則不消矣擬欲攻之當先解表方可下之若表已解而內不消大滿大堅實有燥屎方可議下若不宜下而遽攻之諸變不可勝數輕者必篤重者必死

兩脛逆冷證治

頭痛如裹兩脚自膝以下皆冷胸間多汗時時譫語或作陰證治以附子輩意其足冷而厥也然其脈關濡尺急乃溼溫脈證其病先日受溼而又中喝溼熱相搏故此證成急以白虎三投而解

按無求子傷寒百問曰兩脛逆冷此名濕溫也其人嘗傷於濕因而中暑濕熱相搏則發濕溫病苦兩脛逆冷又胃中多汗頭目痛苦妄言其

脈陽濡而弱陰小而急治在太陰

脾屬土主溼

不可發汗汗出必不能言耳

聾不知痛所在身青面色變名曰重暍如此死者醫殺之耳白虎加蒼

朮主之

此方出傷寒微旨

手足逆冷證治

傷寒六七日自頸以下無汗手足厥冷心下滿大便秘結或見其逆冷又汗出滿悶以爲陰證然其脈沈而緊大便結者爲虛結安得爲陰脈雖沈

緊爲陰證但少陰證多是自利未有祕結此乃半在表半在裏也投以小柴胡湯大便得通而愈

按傷寒惡寒手足冷心下滿口不欲食大便鞭脈細者此爲陽微結必有表復有裏也脈沉亦在裏也汗出爲陽微假令純陰結不得復有外證悉入在裏此爲半在表半在裏也脈雖沈緊不得爲少陰病所以然者陰不得有汗今頭汗出故知非少陰也可與小柴胡湯特不了了者得屎而解也或曰仲景云病人脈陰陽俱緊及汗出者亡陽也此屬少陰且謂四肢冷脈沈緊全是少陰然大便鞭頭汗出不得謂少陰蓋頭者三陽所聚三陽自胸中而還有頭汗自是陰虛故曰汗出爲陽微而陰不得有頭汗也若少陰有頭汗九死一生故仲景平脈汗法云心者火也名火陰其病頭無汗者可治有汗者死心爲手少陰腎爲足少陰然相與爲病是爲得之

發熱惡寒證治

人患發熱惡寒自汗脈浮而微弱以三服桂枝投之遂愈仲景云太陽中風陽浮而陰弱者汗自出齋齋惡寒淅淅惡風翁翁發熱宜桂枝湯

按仲景云假令寸口脈微名曰陽不足陰氣上入陽中則惡寒也尺脈弱名曰陰不足陽氣下陷入陰中則發熱發其汗使陽氣微又大下之使陰氣弱此爲醫所病而然也大抵陰不足陽從之故陽內陷發熱陽不足陰往乘之故陰上入陽中則惡寒陰陽不歸其分是以發熱惡寒也故孫真人云有熱不可大攻之熱去則寒起

面垢惡寒證治

頭痛身熱煩渴脈大而虛小便赤背惡寒而面垢中暑也投以白虎湯數日愈

按仲景云脈虛身熱得之傷暑又云其脈弦細芤遲何也素問曰寒傷

形熱傷氣蓋傷氣不傷形則氣消而脈虛弱所以弦遲芤細皆虛脈而可知矣

剛瘧證治

傷寒身熱無汗足寒而攣頸項瘰癧斷齒大便不利診其脈實而有力此剛瘧證也先以承氣湯下之次以續命湯調之愈矣

或繼之以白虎加人參湯與黃連阿膠湯

而後以竹葉石膏湯收功

按仲景云太陽病發熱無汗反惡寒者名曰剛瘧發熱汗出而不惡寒者名曰柔瘧陳修園云剛瘧脈宜緊弦柔瘧脈宜浮弦瘧風強病也舊本以瘧爲瘧傳寫之誤也今改正之其病皆由血枯津少不能養筋所致燥之爲病也然內經謂諸瘧強直皆屬於濕何相反若是乎不知濕爲六淫之一若中於太陰則從陰化爲寒濕其病流於關節而爲痺若中於陽明則從陽化而爲濕熱熱甚而陽明燥化之氣愈烈其病熱爍

強直而爲癱是言癱者言其未成癱之前言燥者言其將成癱之際也
又云赫曦之紀上羽其病癱云熱爲寒抑無汗之癱也又云肺移熱於
腎傳爲柔癱言濕蒸爲熱有汗之癱也千金謂溫病熱入腎中則爲癱
小兒癩熱盛亦爲癱聖經賢訓可據其爲亡陰筋燥無疑仲景云癱之
病可與大承氣以急下之爲下其熱以救陰非下其便以寬脹也此方
大旨在瀉陽明之燥氣而救其津液清少陰之熱氣而復其元陰有起
死回生之妙或問凡曰可與則猶有相酌之意豈因大承氣之過峻而
云然乎而不知此證舍大承氣並無他法猶恐服大承氣之後重證猶
未盡除還當商其再服此際全憑醫家識力或一下之後病勢已減審
係陽明以白虎加人參湯潤陽明之燥審係少陰以黃連阿膠湯救少
陰之陰二湯可以頻服服後又以竹葉石膏湯收功或以三湯用於大
承氣之前全要心靈手敏此仲師可與二字言外之意也

漏風證治

得病身熱頭痛嘔逆自汗如洗已數日矣此證當先止汗三投朮附湯而汗止次日微汗繫繫身涼五日而愈

按葉天士曰自汗之證至於漏不止而惡風及發汗後惡寒又皆表虛必得溫經而後愈大抵傷風則惡風自汗傷溼則身重自汗中暑則脈虛自汗中暍則自汗溼溫則妄言多汗風溫則鼾睡自汗霍亂則吐瀉自汗柔瘳則抽搐自汗陽明則潮熱自汗陰虛則身倦自汗亡陽則遂漏不止自汗或汗如貫珠喘而不休又爲衛絕不治之證也

風溫證治

得疾身熱自汗體重難以轉側多眠鼾睡醫作三陽合病或漏風證治之不愈此蓋風溫病應投以萎蕤湯獨活湯數日可愈

按仲景云太陽病發熱而渴不惡寒者爲溫病若發汗已身灼熱者名

曰風溫風溫爲病脈陰陽俱浮自汗出身重多眠睡鼻息必鼾語言難出若被下者小便不利直視失溲若被火者微發黃色劇則如驚癇時瘕瘕又云陽脈浮滑陰脈濡弱更遇於風變爲風溫大抵溫氣大行更遇風邪則有是證令當春夏病此者多醫作傷寒漏風治非也不是火不可下不可大發汗而仲景無藥方古法謂可取手少陰火足厥陰木隨經所在而取之故用萎蕤湯獨活湯等爲宜若發熱無下證者當用知母石膏湯誤汗之則救以防己黃耆湯

溼溫證治

季夏得疾多汗四肢時冷頭痛譫語其脈關前濡關後數當作溼溫治蓋先受暑後受溼暑溼相搏投以白虎加參次以白虎蒼朮頭痛漸退足漸溫汗漸止數日愈此病名賊邪誤服藥則死

按難經論五邪有實邪虛邪正邪微邪賊邪從後來者爲虛邪從前來

者爲實邪從所不勝者爲賊邪從所勝者爲微邪自病者爲正邪又曰假令心病中暑者爲正邪中溼得之爲賊邪蓋心先受邪而溼勝之水尅火從所不勝者斯爲賊邪五邪之最逆者也難經又云溼溫之脉陽濡而弱陰小而急濡弱見於陽部溼氣搏暑也小急見於陰部暑氣蒸溼也故經曰暑濕相搏名曰溼溫是爲賊邪也

溼家發黃證治

人病身體疼痛面黃喘滿頭痛自能飲食大小便如常或者多以五苓散與之然其脈大而虛鼻塞且煩其證如前則非濕熱與宿穀相搏乃頭中寒濕也

按仲景云身體疼痛發熱面黃而喘頭痛鼻塞而煩其脈大自能飲食腹中和無病病在頭中寒濕故鼻塞納藥鼻中則愈而仲景無藥方其方見外臺刪繁證云治天行熱毒通貫臟腑沈鼓骨髓之間或爲黃疸

須瓜蒂二七枚赤小豆菰米各二七枚爲末如大豆許納鼻中縮鼻當出黃水慎勿吹入鼻中深處

發黃證治

傷寒八九日身體洞黃鼻目皆痛兩膊及項頭腰皆強急大便澀小便如金脈緊且數其病脾先受濕暑熱蘊蓄於足太陰之經宿穀相搏鬱蒸而不得泄故使頭面有汗項以下無之若鼻中氣冷寸口近掌無脈則死如脈與證相應以茵陳湯調五苓散與之數日愈

按葉天士曰發黃宜通利小便分導其氣流行其濕可也故曰治濕而不利小便非其治也

黃入清道證治

夏病黃證鼻肉瘦痛目如金色小便赤澀大便如常則知病不在臟腑睛黃鼻痛則知病在清道中矣清道者華蓋肺之經也若服大黃則必腹脹

爲逆當用瓜蒂散先含水次搗之令鼻中黃水盡出則愈如法治數日病除

脾約證治

傷寒數日身熱頭痛惡風大便不通臍腹膨脹小便頻數跌陽脈浮乃脾約證也此屬太陽陽明仲景云太陽陽明者脾約也又云跌陽脈浮而澀浮則胃氣強澀則小便數浮澀相搏大便則鞭其脾爲約者大承氣大柴胡均不當恐生他證仲景法中麻仁丸不可易也以麻仁丸百粒分三服食頃間盡是夕大便通中汗而解

按浮者風也澀者津液少也小便頻數津液枯少又爍之以風是以大便堅鞭如以大黃朴硝蕩滌腸胃雖不至死恐生他證

胃熱嘔吐證治

傷寒已汗後嘔吐不止強藥不下此汗後餘熱尙留胃脘之故若胃作冷

投以丁香硝石硫黃等熱藥如火濟火何能止也以香薷湯竹茹湯治之數服愈

按葉天士曰表邪傳裏裏氣上逆則爲嘔也大抵傷寒嘔吐多屬半表半裏間有胃熱而嘔吐者經曰嘔多胃寒雖有陽明證不可攻之爲氣逆未收斂爲實也若胃熱而嘔吐者脈弦數口渴是也胃寒而嘔吐者脈弦遲逆冷是也水氣而嘔吐者先渴後嘔渴間怔忡是也又有所謂乾嘔邪熱在胃與穀氣相併逆上冲胸是也治法均不外扶正祛邪則嘔吐自止矣

陽結證治

傷寒發熱口苦咽乾腹滿能食大便閉此陽結也仲景云脈有陰結陽結其脈浮而數能食不大便此爲實名曰陽結其脈沈而遲不能食身體重大便反鞭名曰陰結陽結證宜授以大柴胡湯兩啜可愈

按仲景云脉來藹藹如車蓋者名曰陽結脈來累累循長竿者名曰陰結藹藹如車蓋則是浮而數之狀陽結十七日當劇陰結十四日當劇蓋十七日老陽少陽之數十四日老陰少陰之數老陽之數九少陽之數七七九計十六更進一數陽之數而其道常饒又陽數奇故也老陰之數六少陰之數八八六計十四日不進者陰主靜而其道常乏又陰數偶也如此盈虛消長不能逃乎時數

發斑證治

傷寒七八日發斑肌體如火脉洪數而牢心中煩滿不快俄而變赤黑斑此溫毒也仲景云傷寒脈洪數陰脈實大更遇濕熱變成溫毒溫毒最重也故斑疹生心下不快痞悶以升麻玄參湯與之日夜四五服斑退而愈按華元化云傷寒五日在腹六日在胃入胃則可下也若熱毒未入於胃而先下之者其熱乘虛入胃則胃爛然熱入胃須復下之不得留在

胃中也胃若實而致此病三死一生其熱微者赤斑出劇者黑斑出赤斑出者五死一生黑斑出者十死一生但看人之強弱耳病者至日不即時下之熱不得泄亦胃爛斑出盖是惡候若下之早則熱乘虛入胃或下遲則熱入不得泄須是乘機不可失時庶幾輕可也

筋惕肉瞤證治

有人初得病身微汗脈弱惡風醫者誤以麻黃汗之汗透不止發熱心痛多驚悸夜間不得眠臥譎語不識人筋惕肉瞤振動搖醫者又以鎮心驚風藥治之不知此乃強汗之過也宜以真武湯收之

按仲景云脉微弱汗出惡風者不可服青龍湯服之則筋惕肉瞤此爲逆也惟真武湯可收之又云太陽病發汗汗出不解其人仍然發熱心下悸身瞤動振振欲墜地者真武湯主之三投而大病除次以清心丸竹葉湯解餘毒數日瘥

青筋牽引證治

春病傷寒先寒後熱項筋強急脚蹇縮不得伸如以麻黃除頸強或桂枝加附除足縮皆非治法蓋此乃時行疫氣病爲青筋牽引投以柴胡地黃湯三服而病已

按龐安常論四時受乖氣而成臟腑陰陽濕毒者春名青筋牽夏名赤脉攢秋名白氣狸冬名黑骨溫毒四季中十八日名黃肉隨毒氣在頭項使人青筋牽急故先寒後熱脚縮不得伸蓋謂此也夫天行之病大則流毒天下小則方次一鄉亦有偏著一家者悉由氣運鬱結變成乖戾之氣人遭之而成病善於調攝庶幾可免

霍亂轉筋證治

某一夕病上吐下瀉身冷汗出如洗心煩燥以香薷飲治之翌日遂定再進理中等調之愈

按仲景云病發熱頭痛身疼惡寒吐利者名曰霍亂自吐下又利止而復作更發熱也此病多由暑熱陰陽不和清濁相干飲食過傷三焦瀾亂腹中撮痛煩渴不止兩足轉筋殺人頗急不可緩也

叉手冒心證治

傷寒八九日心下惕惕然以兩手捫心身體振振動搖如以心痛治之必不效此蓋汗過多之所致也宜桂枝甘草湯

按仲景云持脉時病人叉手自冒心心下悸所以然者以重獲汗虛故如此又云發汗過多其人自冒心心下悸欲得按者桂枝甘草湯證投以黃芪建中眞武及甘草桂枝漸得平復

揚手擲足證治

傷寒發熱頭痛不惡風身無汗煩悶脉浮而緊八九日不退此麻黃證也所感多熱是以煩燥投以麻黃湯三服至暮煩愈甚手足躁亂揚擲不止

或以爲發狂須用寒藥不知此汗證也切忌亂服藥守一時須稍定比寐少時中汗出愈

按仲景云傷寒至六七日三部大手足躁亂者欲解也蓋謂此耳若行寒劑定是醫殺

兩手撮空證治

某病傷寒大便不利日晡發熱手循衣縫兩手撮空目直視急更三醫皆曰傷寒最惡證不可治不知此誠爲惡候染此者十中九死仲景雖有證而無治法但云脈弦者生澀者死况經吐下難於用藥謾以藥與若大便得通而脈強者庶可料理也遂用小承氣湯一投而大便通利諸疾漸退脈且微弦半月得瘥

按金匱玉函經曰循衣摸床妄撮慌惕不安微喘直視脈弦者生澀者死微弦者但發熱譫語承氣湯主之又錢仲陽小兒訣法手循衣領及

亂捻物者肝熱也此證玉函列在陽明部陽明胃也肝有邪熱淫于胃經故以承氣湯瀉肝而得強脉則平而和胃且堅不受損此百生之理也讀仲景論不通諸醫書以發明隱奧而專一經者未見其能也須以古今方書發明仲景餘意

舌上滑胎證治

傷寒寒熱往來心下鬱悶舌上白滑胎考舌上白滑胎有數證有陰陽脉緊鼻出涕者有藏結而不可治者有溫瘴丹田有熱者有陽明脅下堅者此證屬陽明宜梔子湯吐之於前小柴胡繼之於後數日汗解而愈

按葉天士曰傷寒邪熱煎燦則津液枯涸是以心苗乾槁而舌生胎矣若邪熱在表則生白胎邪熱在裏則生胎刺其或黃或黑或濇或滑或生芒刺或生裂紋者爲熱氣之淺深也故曰胎白而滑邪熱漸深胎黑而裂邪熱尤極病則危篤矣又曰一切白胎用生薑蘆蜜擦之黃胎用

青布裹指蘸薄荷湯或冷水擦之若胎黑而裂則經所謂熱病口乾舌黑者死乃不治之證

陰陽易證治

某生蓄一婢患傷寒八九日治之得汗而愈未數日某生自病身熱頭重不欲舉目中生花是必與傷寒初愈婦人交接得之陰頭上必腫小腹絞痛所謂陰陽易也生曰前患者婢子意謂已安遂與之交翌日得此疾良苦此證失所治必吐舌數寸而死宜緹鼠糞燒棍散以利其毒旬日愈

按葉天士曰易者陰陽交易之謂也若男病新瘥婦與交而病者曰陽易婦病新瘥男與交而病者曰陰易在男則陰腫小腹絞痛在婦則裏急腰勝重連腹內掣痛其證熱上衝胸氣乏身重頭不能舉足不能移眼中生花四肢拍急百節解散男則卵縮入腹婦則痛引陰中俱用燒棍散或緹鼠糞散竹皮湯等待小便利陰頭腫退爲愈若手足拳攣舌

吐而脈離經者又爲不治之證也。燒棍散取婦人中棍近隱處剪燒灰以水和服婦人病取男子棍襠○猥鼠糞

散猥鼠糞韭根○竹皮湯青竹皮

狐惑證治

傷寒逾旬上下唇皆蠹蝕聲嘶而咽乾舌上白胎齒無色此病名狐惑殺人甚急以投雄黃丸瀉心湯或治蟪桃仁湯數日可愈

按葉天士曰傷寒失汗邪熱入腹以致飲食少而腹胃空虛三蟲舉而求食其候四肢沈重精神困倦惡聞食氣默默欲臥目閉舌白齒晦面眉間赤白黑色變易無常然蟲蝕下部爲狐下唇有瘡其咽乾蟲蝕其藏爲惑上唇有瘡其聲啞通用治蟪桃仁湯

懊儂怫鬱證治

傷寒八九日身熱無汗喜飲時時譫語因下利後大便不通三日非煩非燥非寒非痛夜不得眠但心沒曉會處或時發一聲如歎息之狀兩手關

脈長按之有力此懊憹怫鬱證蓋胃中有燥屎宜與承氣湯服之下燥屎復下澹滯得利而解

按仲景云病者小便利大便乍難乍易時有微熱怫鬱不得眠者有燥屎也承氣湯主之蓋屎在胃則胃不和素問曰胃不和則臥不安此所以夜不得眠也仲景云胃中燥大便堅者必譫語此所以時時譫言也非煩非燥非寒非痛所謂心中懊憹也間如歎息而發一聲所謂水氣怫鬱也燥屎得除大便通利陰陽交和故病得除

夜間不眠證治

初得病身熱脈浮自汗醫者又誤以麻黃汗之發熱愈甚夜間不得眠頭重煩悶悸悸然中風證強責汗之過也先予豬苓湯次投以當歸地黃麥冬芍藥烏梅之類爲湯飲之不汗而愈

按仲景云太陽病發汗後大汗出胃中乾燥不得眠其人欲飲水者少

少與之令氣胃和則愈又黃帝鍼經曰衛氣者晝行陽夜行陰衛氣不得入陰常行於外行於外則陽滿滿則陽蹻盛而不得入於陰陰虛則夜不得眠也茲津液內竭胃中乾燥獨惡與陽陰無所歸以當歸地黃補血用烏梅以收之故不汗自愈

下利服承氣湯證治

某病傷寒下利身熱神昏多困譫語不得眠或見其下利以譫語爲鄭聲皆陰虛證而不知爲承氣湯證投以小承氣得利止而下燥屎俄得汗解按仲景云下利而譫語者有燥屎也屬小承氣湯故內經云微者逆之甚者從之逆者正治從者反治帝曰何謂反治岐伯曰寒因寒用通因通用王冰以爲大熱內結注瀉不止熱宜寒療結伏須除以寒下之結散利止此寒因寒用也小承氣止利正合此理

